

LOU JARDIN DE PECAI !

Ah ! de segur qu'èro un poulit jardin, e bèn tengu aquéu dóu paure Giraudet.

Fau dire que dos miolo ié fasién de femié touto l'annado. qu'uno pouso-raco, à touca, picavo dins lou « canau dous de Pecai » pèr arrousa, e qu'un jardinieroun ié dounavo un bon cop de man.

Un jour d'avoust que lou curat di Santo passavo aqui, pèr ana vesita li salin, ounte lou batage e lou levage de la sau se fasié à pres-fa, s'arrestè davans lou cledat :

- Quante bèu jardin qu'avès, cridè à Giraudet, fai plesi de vèire !

Giraudet, flata, ié venguè :

- Poudès intra, Moussu lou Curat, se vous fai gau. E l'autre d'intra. Esbalausì, faguè :

- Mancas pas d'ourtoulaio, e di mai poulido, encaro. Hé ! li causo ié venon bèn, eici. Pamens, sias au mitan di salin ; es vrai qu'avès l'aigo dóu Rose, dins lou «canau dous»!

Regardas-me 'n pau aquéli poumo d'amour, aquélis ensalado, e tambèn li meloun... Emé tout ço qu'avès, poudès fartaia.

« Oh !... Espinchas un pau aquéli quàuqui souco de chasselas, emé si rasin daura que regisclon de soulèu e... que vous dison : Manjas-me ! »

- Poudès li tasta, Moussu lou Curat, ié diguè Giraudet. E lou prèire de n'en prendre uno poulido grapo, e de tasta.

- Qu'acò's bon ! e goustous !... Coume lou bon Diéu fai bèn ço que fai... Car es Èu que n'es l'encauso ! Mistral lou dis, dins si obro, que vautre, gènt de la terro

...« *emé lou bon Diéu, travaias de mita* ».

E countunièron ansin enjusqu'i canci, ounte fuguèron arresta pèr un baragnas roumegous nega dins uno baucò espesso, qu'uno moustelo aurié pas travessa.

Aqui, lou brave Giraudet se virè devers lou capelan e ié faguè, en ié moustrant lou baragnas :

- Vesès acò, Moussu lou Curat... ? E bèn, avans, quouro lou bon Diéu s'en ócupavo soulet, tout lou jardin èro coume acò !

J.-B. ROSSIGNOL